

# Hinderk vragt: kin ie Diepen zien Snoefies?

■ GRUNNEN – Over taimkes van vrouger kin Henk (Hinderk) Scholte joe hail wat vertellen. Maistieds kin e doar nog n laid van zingen ook. Gain wonder ja, want as e nait veur of mit meziekgroep Törf aan loop is, den is e wel op zuik noar volkse wiezen en koepletten oet olle deuzen. As n lutje neefie van Ate Doornbosch zeg mor; of as *dialectoloog*, zoas Törf-moat Eddy de Jonge Hinderk zien belangstellen in streektoal onder ain woord brocht het.

Benoam nijsgierig is e noar Grunneger kemieken van vrouger. Over de zongen '*veurdrachten veur 1 Heer*' van Albert Bol het e al ais vroagen steld in n oetzenden doudes-tieds van 'Sloaperstil'. Mit rezeltoat: der kwam familie boven wotter, mit werachteg nog zang van Albert op n olle ploot ook. Nou wil Hinderk gern wat meer waiten over Jan Diepen, dij om en bie 1905 as Grunneger kemiek bekind west het.

In n ol nummer van 'Dörp en Stad' het zekere B. Ram al ais

schreven, dat t laid 'Grunneger Snoefies' deur Huënder aiglieks t waark van Diepen wezen mout. Wel wait hier meer van of over? t Laid, op de wieze van 'O laive Mathilde', gaat over:

*...voele stroaten, dij ze mor haalf vegen loaten... mor gingen de drekmenners stoaken, waar mos wie der den mit hèn? Over de elektrieke tram, dij joe pardoes, zunder kraaien, noar de haaien rieden kin. En over n Commissoaris, dij krigt vanzuls meer seloares, dij nait haalf bakken, mor goar is en kloar is, nóót noar is. Drijdoezend viefhonderd seloares krigt mie dij commissoaris, mor hai is n flink commesoares, dat hebben de roadslu verkloard.*

Ie haren netuurlek al deur, dat t hier nait gaat over n veurloper van Vonhoff, mor over n commesoares van pelitie van vrouger. Dij haar t dou niks begrepen op dansen en op dichte daanshoezen. Van preblemen mit open inrichtens haren ze dou in Stad nog gain wait... '88